

19 NOV 2002

Dewan-Johor (Pelajar)

46,000 PELAJAR RMT LAYAK TERIMA BANTUAN SEKALI RM120 TUNAI

JOHOR BAHRU, 19 Nov (Bernama) -- Semua 46,000 pelajar di bawah Rancangan Makanan Tambahan (RMT) layak menerima bantuan sekali tunai RM120 yang membabitkan peruntukan RM5.52 juta bagi Johor, Dewan Undangan Negeri diberitahu hari ini.

Pengerusi Jawatankuasa Pendidikan dan Guna Tenaga, Belia, Sukan dan Kebudayaan Negeri, Ahmad Zahri Jamil berkata peruntukan itu akan diberikan kepada semua pelajar miskin yang dikenal pasti bagi membantu mereka membeli pakaian dan peralatan sekolah.

Menjawab soalan Datuk Khoo Che Wat (BN-Kulai), beliau berkata Jabatan Pendidikan Negeri sedang mengumpul dan memproses maklumat pelajar yang layak menerima bantuan itu untuk dihantar ke Kementerian Pendidikan mulai awal Disember.

Ahmad Zahri berkata pemberian bantuan sekali tunai itu dan pemberian baucer tuisyen pendidikan seperti yang dicadangkan oleh Perdana Menteri Datuk Seri Dr Mahathir Mohamad dalam Bajet 2003, membuktikan perhatian berat kerajaan terhadap golongan miskin, khususnya dalam bidang pendidikan.

Katanya, bantuan juga diberikan dalam bentuk yuran peperiksaan, yuran sekolah, yuran asrama, wang saku, pengangkutan sekolah, bantuan am dan bimbingan kaunseling.

Beliau berkata kerajaan negeri juga memberikan bantuan dengan menyediakan program Tuisyen Kampung bagi 45,000 pelajar di seluruh negeri yang menduduki UPSR, PMR dan SPM setiap tahun sejak 1997.

Katanya Biasiswa Kenangan Datuk Onn pula disediakan untuk pelajar miskin dari keluarga berpendapatan RM350 ke bawah, yang cemerlang di bidang akademik dan kegiatan luar bilik darjah serta kepimpinan di sekolah atau kes khas pelajar yang kematian ibu bapa, yatim piatu dan mengalami musibah seperti kebakaran.

Biasiswa itu melibatkan anugerah RM300 setahun untuk tingkatan satu hingga empat, RM360 setahun bagi tingkatan lima, RM600 setahun bagi tingkatan enam rendah dan enam atas aliran sastera dan RM720 setahun bagi enam rendah dan atas aliran sains.

-- BERNAMA

MNY MAI